



Aningaasanut Nunanullu Allanut Naalakkersu- isoq

Isertuussassaq

Aningaasaqarnermut Ataatsimiititaliap suliaq nr. 01.31.06/09-00413 pillugu sapaammi ulloq 31. maj 2009-mi aalajangiinera pillugu Naalakkersuisunut ilisimatitsineq

**Arctic Green Food A/S-imut (AGF) sullissinissamut isumaqatigiissutip sinnerata
akuerineqarnissaa pillugu**

Naalakkersuisut inassutigaaat ,

AGF-imut sullissinissamut isumaqatigiissut sinneruttoq 4.139.775 kr.-inik aningaasartaqartoq kontomit pingarneq 50.01.18, Ingerlatsinissamik isumaqatigiissutit, atorlugu akilerneqarnissaa ilanngussat ilanngullugit Aningaasaqarnermut Ataatsimiititaliap akuerissagaa.

Aningaasaqarnermut Ataatsimiititaliap oqaaseqaatai

AGF-imik sullissinissamik isumaqatigiissutaagallartoq piffissamut qaammatinut pingasunut atuuttussaq ulloq 20. februar 2009-mi Aningaasaqarnermut Ataatsimiititaliamit akuersissutigineqarpoq (FU-p suliaa 09-406). 2009-p sinnerani AGF-imik sullissinissamik isumaqatigiissutip akuersissutigineqarnissaa suliama matumani Naalakkersuisut qinnutigaat. Kontomi pingarnermi 50.01.18-imi, Ingerlatsinissamik isumaqatigiissutinut, tunisassiorffinnut tunngassutilimmi aningaasaliissutit sinneruttut atugassiissutigineqarnissaat akuersinermut ilaatinneqassasoq Naalakkersuisut qinnutigaat.

Aalajangikkami 09-406-imi Aningaasaqarnermut Ataatsimiititaliaq arlalippassuarnik kaammattuuteqarpoq. Kaammattuutit taakku killiliinnarmik piviusunngortinneqarsimasut ataatsimiititaliap paasivaa. Sullissinissamik isumaqatigiissutip inatsisilerinikkut pitsaassusia suli killeqartorujussuummat minnerunngitsumik ajornartorsiutaavoq. Pingaartumik aalajangikkami 09-406-imi immikkoortoq 7-ip ataani *minnerpaamik piunasaqaatit* Aningaasaqarnermut Ataatsimiititaliamit nalunaarsorneqartut Naalakkersuisunit malinniarneqarsimanngillat. Assersuutigalugu Aningaasaqarnermut Ataatsimiititaliamut aammalu Kukkunersuinerumut Ataatsimiititaliamut aamma ilisimatitsisarnissamik AGF-ip pisussaaffini malinngippagu sullissinissamik isumaqatigiissutinut akiliutit ilaat tunniutinnginnissaannut Namminersornerullutik Oqartussat pisussaaffeqarnerat

sullissinissamik isumaqatigiissummut Naalakkersuisut ilanngussimannngilaat. Naalakkersuisut ataatsimiititaliap isummernissaanut tunngavissiaminni tamanna erseqqissaatigisimanngimmassuk Aningaasaqarnermut Ataatsimiititaliap ajuusaarnartoqartippaa.

Tamatuma saniatigut aalajangikkami 09-406-imi Aningaasaqarnermut Ataatsimiititaliap piunasaqaataanut naapertuutinnngitsumik sullissinissamik isumaqatigiissutip kommunitut tunniunneqarnissaanut tunngavissat ersarissut ilanngunneqarsimannngimmata Aningaasaqarnermut Ataatsimiititaliap paasivaa.

Kingusinnerpaamik aningaasaliissuteqarnissamik isumaqatigiissummut matumani pineqartumut atatillugu AGF-imik sullissinissamik isumaqatigiissutinut akiliuteqartarnermi pisortanut iluanaarutaasunut ataatsimut naliliissummik Naalakkersuisut saqqummiussissasut aalajangikkami 09-406-imi Aningaasaqarnermut Ataatsimiititaliaq kaammattuivoq. Isummernissamut tunngavissiaq malillugu sullissinissamik isumaqatigiissutinut akiliutit inuiaqatigiit aningaasaqarnerannut sunniutaannik misissueqqissaarinermik AGF maanna suliarinnilerpoq. Taamaattumik Aningaasaqarnermut Ataatsimiititaliap kaammattuutaa Naalakkersuisunit malinneqarsimannngilaq, tamatumunngali taarsiullugu AGF-ip misissueqqissaarineranut aggersumut innersuussisoqaannarsimalluni. Aningaasaqarnermut Ataatsimiititaliamit tamanna naammagineqannngilaq. Naalakkersuisut iliuseqarnerat Aningaasaqarnermut Ataatsimiititaliap kissaatigisaatut aalajangiinissamut tunngavissaqarluartitsinngilaq, tamatumalu saniatigut misissuinissaq tamanna AGF-imut suliami illuatungiliuttumut suliasannngortinneqarsinnaanngilaq.

Isummernissamut tunngavissiap Aningaasaqarnermut Ataatsimiititaliamut nassiutinnginnerani nutaamik tusarniaassutigineqarnissaa ANAN-ip kissaatigigaa ANAN-imit tusarniaanermut akissummi ilanngunneqartumi allassimavoq. Nutaamik tusarniaaneq tamanna ingerlanneqareersimassasoq Aningaasaqarnermut Ataatsimiititaliap tunngavissaatittariaqarpaa, tassami isummernissamut tunngavissiaq nutaamik tusarniaassutigineqartut nassiunneqarpat tamanna Naalakkersuisut isummernissamut tunngavissiaasa aningaasaqarnikkut kinguneqartussat tusarniaassutigineqartarnissaat pillugu maleruagassanut pinngitsoorani naapertuutissanngimmat. Tassunga atatillugu – kingullermik professor Ole Spiermannimit oqaatigineqartut – Missingersuusiornermut inatsimmi (ilaatigut tusarniaaneq pillugu) maleruagassanik avaqqutsinissaq Naalakkersuisut aalajangerpassuk Aningaasaqarnermut Ataatsimiititaliamut ilisimatitsissuteqarnissamut Naalakkersuisut pisortatigoortumik pisussaaffeqarmata Aningaasaqarnermut Ataatsimiititaliamit eqqaasitsissutigineqassaaq.

AGF-ip naatsorsuutaani saqqummiunneqartuni amigaatit annertoorejussuit arlallit ANAN-imit uparuarneqartut Aningaasaqarnermut Ataatsimiititaliap maluginiarppaa. Ajornartorsiutit amigaatillu oqaatigineqartut annertoorejussuummata ataatsimiititaliap isumaqatigaa. Ajornartorsiutit amigaatillu taakku Naalakkersuisunngortussanit pinngitsooratik isummerfigineqartariaqarput.

AGF pillugu aningaasaliissuteqarnissamik qinnuteqaatini aggersuni ingerlatseqatigiiffimmi illuutitigut pigineqartut nassuiaatigineqartassasut Aningaasaqarnermut Ataatsimiititaliap qinnutigissavaa. Ingerlatseqatigiiffiup 2008-mi ukiumoortumik nalunaarusiaa malillugu piffissap qaammatit 19-it ingerlanerinnaanni illuutitik tamakkiisumik isumakkeerinissamut naatsorsuutiginninnermut tunngavigineqartoq nassuiaammut ilanngunneqartariaqarpoq. Tassunga atatillugu ingerlatseqatigiiffiup Maniitsumi piginneqatigiilluni inissianik arlalinnik pigisaqarnerani kingunerisinnaasat ilanngunneqassasut qinnutigineqarpoq.

Inatsisartunut qinersinissamik nalunaaruteqartoqarnerata kingorna qinnuteqaat Aningaasaqarnermut Ataatsimiititaliami suliarineqartussasut nassiunneqarpoq. Tamanna ajornartorsiutitaqarpoq. Qinersinissamik nalunaaruteqartoqarnerata kingorna aningaasaliissuteqarnissamik suliassap taassuma nassiunnissaanut Inatsisartunit ersarinnerusumik tunngavissinneqarnissartik Naalakkersuisut qulakkeerluarsimasinnaagaluarpaat. 2005-imi qinersinissamik nalunaaruteqarnermi periuseq atorineqartoq Naalakkersuisunit atorluarneqarsimasinnaagaluarpoq. Taamaalilluni 2005-imi qinersinissamik nalunaaruteqarnissaq sioqqullugu inatsisissatut siunnersuummik Naalakkersuisut saqqummiussippot, tassuunakkut qinersinissamik nalunaaruteqarnerup kingorna aningaasaliissuteqarnissamik suliniutinut Inatsisartut tapersersuinissaat qulakkeerneqarluni. Inatsisissatut siunnersuut Inatsisartunit akuersissutigineqarpoq, tamatumuunakkullu qulakkeerneqarpoq Inatsisartunut qinersinissamik nalunaaruteqartoqarnerata kingorna aningaasaliissuteqarnissamik qinnuteqaatinik arlalinnik akuersissuteqarnissamut Aningaasaqarnermut Ataatsimiititaliap ersarissumik tunngavissaqalerpoq. (Tak. Inatsisartut inatsisaat nr. 6, 23. september 2005-imeersoq) Akerlianik 2009-mi aningaasanut inatsisip akuersissutigineqarneratigut tunngavissaritinneqartut Inatsisartunit aalajangersarneqartut qinnuteqaammit matumani pineqartumit qaangerneqanngillat, tamannalu piffissami matumani suliaq ingerlanneqassanersoq pillugu Aningaasaqarnermut Ataatsimiititaliap aalajangerneranut tunngavigineqarluni.

Pisumi matumani makku akornanni oqimaaqatigiittoqarnissaa qulakkeerneqassasoq Aningaasaqarnermut Ataatsimiititaliap isumaqarpoq:

- tunisassiornerup ingerlatiinnarneqarnissaanik pisariaqartitsineq
- AGF-imik sullissinissamik isumaqatigiissummut Aningaasaqarnermut Ataatsimiititaliap piumasaqaataasa attatiinnarneqarnissaanik pisariaqartitsineq
- Inatsisartunngortussat Naalakkersuisunngortussallu iliuseqarnissamut periarfissaasa killilersorneqannginnissaanik pisariaqartitsineq.

Tamanna tunngavigalugu piffissamut qaammatinut marlunnet sullissinissamik isumaqatigiisut Aningaasaqarnermut Ataatsimiititaliamit akuerineqarsinnaavoq, tamatumalu kingunerisaanik aningaasaliissutit qinnutigineqartut amerlaqataannik ikilineqassallutik. Sullissinissamik isumaqatigiisut saqqummiunneqartoq qaammatit arfineq marluk inulaarlugit atuutissaaq. Taamaalilluni 4.139.775 kr.-inik aningaasaliissutit qinnutigineqartut, 1.183.000 kr.-inut naapertuuttut 2/7-iannik atugassiissuteqarnissaq Aningaasaqarnermut Ataatsimiititaliamit akuerineqarsinnaavoq.

Naggasiutigalugu oqaatigineqassaaq inassuteqaatip siuliani allassimasup ilusilerneqarnera aningaasaliissutit ilusilersorneqarnissaannut naammaginatumik naapertuutinngimmat. Aalisarnermut, Piniarnermut Nunalerinermullu Naalakkersuisoqarfimmi qinnuteqaatit taama amigaateqartarnerat Aningaasaqarnermut Ataatsimiititaliamit ajoraluartumik aatsaat eqqaasitsissutigineqanngilaq.

Ulloq 2. juni 2009-mi Inatsisartunut qinersinerup kingornata tungaanut aalajangigaq manna isertuunneqassaaq.

Aningaasaqarnermut Ataatsimiititaliap aalajangiinera

Piffissami qaammatini **marlunni** atuuttussamik sullissinissamik isumaqatigiissuteqartoqassasoq aammalu aningaasaliissutit qinnutigineqartut 2/7-iisa, 1.183.000 kr.-inut naapertuuttut atugassiissutigineqarnissaat Aningaasaqarnermut Ataatsimiititaliamit akuersissutigineqarpoq.

Tamatuma saniatigut kontomi pingaarnermi 50.01.18-imi, Ingerlatsinissamik isumaqatigiissutinut, tunisassiorffinnut tunngasumi aningaasaliissutit sinneruttut atugassiissutigineqarnissaannik Naalakkersuisut qinnuteqassappata ajornartorsiutit aalajangikkami 09-406-imi “Aningaasaqarnermut Ataatsimiititaliap oqaaseqaataasa” ataanni apeqqutit ataatsimiititaliamit oqaatigineqartut tamakkiisumik isummerfigineqarsimassasut Aningaasaqarnermut Ataatsimiititaliamit **tungavissaatinneqarpoq**.

Aningaasaqarnermut Ataatsimiititaliap sinnerlugu

Augusta Salling

Aningaasaqarnermut Ataatsimiititaliami siulittaasoq